



Komunikadu Imprensa
04 Novembru 2024

JSMP kongratula selebrasaun Loron Nasionál ba Feto Timor-Leste no ezije entidade hotu atu aseguira protesaun no liberta feto hosi kualker forma violénsia hasoru feto

Iha loron 3 fulan Novembru kada tinan, selebra nu'udar Loron Nasionál ba Feto Timor-Leste. Loron ne'e, nu'udar loron importante ba feto hotu iha Timor-Leste, tanba hatu'ur loron ida ne'e hanesan Loron Nasionál. Kompromisu ida ne'e, hatudu katak Estadu Timor-Leste, rekoñese importansia hosi kontribuisaun, papél no partisipasaun feto iha kontestu konstrusaun no dezenvolvimentu nasionál. Tema ba komemorasaun tinan ida ne'e mak "Feto Iha Prosesu Dezenvolvimentu Nasionál Depois Tinan 25 Konsulta Populár."

Ho komemorasaun ne'e atu fó hanoin fila fali ba ita hotu katak, feto ninia envolvimentu no papél importante no determinante tebes iha aspeitu hotu-hotu. Mezmu nune'e iha realidade feto barak sei kontinua sofre hosi forma violénsia oioin iha sosiedade. Violénsia hirak ne'e, infelismamente akontese barak liu iha família ka iha uma laran ne'ebé feto sira tuir loloos hetan protesaun no sente seguru. Relatóriu JSMP tinan 2022) konfirma katak entre tinan 2020 to'o 2022, kazu Violénsia Bazeia ba Jéneru (VBJ) okupa fatin aas liu entre **71% to'o 75%** hosi total kazu krime ne'ebé JSMP monitoriza iha tribunál sira.

Mezmu iha ona instrumentu legais no esforsu nomós iniciativa sira hodi proteze no aseguira feto no labarik feto sira livre hosi kualker forma violénsia iha família no sosiedade no liu-liu atu aseguira feto no labarik feto livre hosi tratamenu kruel, lakon liberdade no vida tanba violénsia oioin, maibé iha realidade hatudu katak feto ho labarik feto mak kontinua sai vítima. Kazu ida ikus liu iha 11 Outubru 2024, ne'ebé feto grávida ida lakon nia vida hamutuk ho ninia oan iha nia isin, hatudu prova klaru katak esforsu no investimentu atu proteze feto hosi violénsia seidak konsege hatudu rezultadu pozitivu.

"JSMP hein katak ho komemorasaun ne'e bele fó hanoin filafali ba komponente sosiedade tomak atu hamutuk prevene violénsia kontra feto no labarik feto atu feto no labarik feto la kontinua sai vítima, livre hosi kualker krime no aseguira katak feto no mane serbisu hamutuk ba dezenvolvimentu nasionál," dehan Sr. Casimiro dos Santos, Diretór Ezekutivu Interinu JSMP.

Bazeia ba rezultadu monitorizasaun JSMP nian iha Tribunál Judisiál Primeira Instáncia sira hotu hatudu katak, feto no labarik feto sira mak kontinua moris iha violénsia nia laran, ida ne'e hatudu hosi kazu ne'ebé julga iha tribunál sei kontinua domina hosi kazu violénsia bázeia ba jéneru no maioria feto no labarik feto mak kontinua sai vítima.

JSMP konsiente katak comunidade feto sira, iha área rurais, sei nafatin hasoru dezafiu estrutural oioin atu defende sira nia direitu konstitusionál, tanba influencia hosi prátika kostume lokal ne'ebé mak dala barak diskrimina, ignora no prezudika

sira nia direitu, mezmú Konstitusaun RDTL, la fó fatin ba prátika diskriminativu hirak ne'e, maibé iha realidade ida ne'e sei akontese.

Esforsu barak maka Governo, Organizasaun Sosiedade Sivil, no Ajensia Internasionál sira halo hodi luta kontra violénsia hasoru fetu no labarik fetu sira iha Timor-Leste, maibé violénsia hasoru fetu no labarik fetu kontinua aas no iha kazu balun to'o halakon fetu no labarik fetu nia vida.

Tanba ne'e, JSMP ezije entidade tulela, instituisaun relevante sira iha setór justisa no sosiedade tomak, atu reeve ita ninia estratéjia no esforsu sira ne'ebé ita halo durante dekada ida ne'e ho asegura esforsu no intervensaun sira orientadu ba nesesida ba prevensaun jerál violénsia hasoru fetu iha sosiedade.

Atu hetan informasaun kompletu favor kontaktu:

Casimiro dos Santos
Diretór Ezekutivu Interinu JSMP
Diresaun e-mail: casimiro@jsmp.tl
Telefone: (+670) 33238883/77257466
Website: <https://jsmp.tl>
info@jsmp.tl